



Ilaqutariinnermut Peqqissutsimullu Ataatsimiititaliaq
Inatsisartut
/MAANI

**UPA2017/131 Nipangiussisussaataaneq paasissutissanillu isertuussanik
ingerlatitseqqiisarneq pillugit apequtinut akissutit**

13-05-2017
Sags nr. 2016 - 8524
Akt. id. 5355375

**1) Pisariaqartinneqartoq tassaava inatsisip naleqqussarneqarnissaa imaluunniit
ilitsersuinerup paasisitsiniaanerullu pitsanngorsarneqarnissaat?**

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iniian@nanoq.gl
www.naalakkersuisut.gl

Meeqqat tapersorneqarnissaannut Inatsisartut inatsisissaatut siunnersuummi § 43, imm. 3-p suliassat meeqqanut tunngasut suliarineqartarnerat pillugit malittarisassanik Naalakkersuisut aalajangersaanissamik pisinnaalersissavai, matumani ilaallutik meeqqat pillugit suliassat pineqartillugit oqartussaasut akunnerminni paasissutissanik paarlaasseqatigiissinnaanerannut tunngasut.

Isumaginninnermut, Ilaqutariinnut, Naligiissitaanermut Inatsisinillu Atuutsitsinermut Naalakkersuisoqarfik taassuminnga tunngaveqarluni Namminersorlutik Oqartussat meeqqat tapersorneqarnissaat pillugu nalunaarutissaannik siunnersuummik suliaqarput (oqartussaasutut suliassat pillugit nalunaarut) suliarlu ammasumik tusarniutigineqarluni nassiunneqaqqammerpoq (takuuk ilanngussaq 1).

Oqartussaasutut suliassat pillugit nalunaarut, isumaginninnermi sullissinerni misissueriaatsit iliuusissatullu pilersaaruseriaatsit pillugit sukumiisumik malittarisassanik imaqarpoq, taamaalillunilu ulluinnarni pineqartunut attuumassutilimmik sulisunut sullissisunullu sakkussatut qitiusutut inissittussaalluni, taannalu oqartussaasut akornanni paasissutissanik paarlaasseqatigiissinnaaneq pillugu maleruagassanik ersarissunik imaqarpoq, matumani ilaallutik sullissisut ilinniarsimasut kikkusut akornanni paasissutissanik paarlaasseqatigiittoqarsinnaanersoq, kiisalu suliassani meeqqanut tunngasuni paasissutissat paarlaanneqarsinnaaneri qanoq ililluni pisinnaanersoq.

Taamaalilluni Meeqqat tapersorneqarnissaannut Inatsisartut inatsisissaattut siunnersuut tunngavigalugu meeqqat pillugit suliaqartoqartillugu paasissutissanik paarlaasseqatigiinnermi malittarisassanik ersarissunik atuutilersitsisoqassaaq.

Taamaattumik meeqqat tapersorneqarnissaannik Inatsisartut inatsisissaattut siunnersuutip maanna suliarineqartup aaqinneqarnissaa maannarpiaq pisariaqartinneqanngilaq.

Isumaqarpungali ilinniartitsineq, paasissutissiineq ilitsersuinerlu aqqutigalugit oqartussaasut sulianillu ingerlatsisut akunnerminni siunertamut naapertuuttumik suleqatigiilluarsinnaasut, matumani meeqqanut tunngasunik suliaqarnermi

suleqatigiilluarfissat ilanngullugit sulianik ingerlatsinerni paasissutissanik paarlaasseqatigiittarnerit qanoq ilinerani qanorlu paarlaasseqatigiittarnerit ingerlanneqartarnissaat pillugit ersarissaanerit aqputigalugit.

Taamaattumik iliuusissanik arlariinnik aallarnisaareerpunga, matumani ilaallutik ilitersuutit suliarineqarneri, kiisalu kommunit ingerlatsiviini sullissisut ilinniartinneqarnerisa ingerlanneqarnissaat.

2) Siunnersuutip aappassaaneerseqarnissaanut allannguutissatut siunnersuummik erseqqissaataasumik saqqummiussinissaq piareerseqarsinnaava?

Meeqqat pillugit suliassat pineqartillugit oqartussaasut akunnerminni paasissutissanik paarlaasseqatigiittarnerinut tunngasut pillugit aalajangersagaliortoqareermat, aammattaarlu maannangaaq ilaatigut ilitersuusiassanut missingersuusiat suliarineqalereermata, matumani paasissutissanik paarlaasseqatigiissinnaanermi sulianik ingerlatsinerni aporfiusinnaasut sukumiisumik suliarineqaleruttormata inatsisissatut siunnersuutip aappassaaneerseqannginnerani allannguutissatut siunnersuusiortoqarsinnaassaaq.

Innersuussutigissavarali meeqqat pillugit suliassat pineqartillugit paasissutissanik paarlaasseqatigiittarnerit pillugit malittarisassat aammalu isumaginninnermi sullissinnermi misissuinerne qitiusumik malittarisassat iliuusissatullu pilersaarusionerit pillugit oqartussaasutut suliassat pillugit nalunaarutissami allassimasut attatiinnarneqassasut, taannami kommunit ingerlatsiviini ulluinnarni pineqartunut attuumassutilimmik sulisunut sullissisunullu qitiusutut sakkussaammat.

Inussiarnersumik inuulluaqqusillunga



Sara Olsvig

Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoq